



UNIDADE 5

Cal prefires?

Nesta unidade imos facer a lista das cousas que necesitamos para pasar unha fin de semana fóra e decidir como as conseguimos.


Para iso, imos aprender:

◆ a expresar a necesidade ◆ a captar a atención das persoas ◆ a identificar e describir obxectos ◆ a preguntar polos produtos nunha tenda ◆ a preguntar o prezo e pagar ◆ a invitar ou propoñer algo ◆ a aceptar ou rexeitar un convite ◆ a dar escusas e a xustificarnos ◆ os números a partir de **100** ◆ a forma e algúns usos do imperativo ◆ os demostrativos

1. NUN BAR

A. Observa estas ilustracións. Que relación cres que teñen estas persoas entre elas? Que cres que pasa en cada situación? Coméntao co teu compañeiro.

- Eu creo que Carlos e Abel son amigos. Están nun bar e Abel quere invitar a Carlos, pero...



B. Agora escoita as conversas e comproba as túas hipóteses. Cales destas cousas fan os protagonistas de cada unha das situacións? Márcalo.

	1	2	3	4
invitar				
presentar a alguén				
pedirlle algo ao camareiro				
pagar				
interesarse pola vida de alguén				
saudar				
despedirse				
aceptar un convite				
rexear un convite				

2. EU NUNCA LEVO SECADOR DE PELO

A. Sabela vai pasar a fin de semana nun apartamento na costa. Esta é a súa maleta. Sabes como se chaman as cousas que leva?

- ___ xel de baño
- ___ camiseta
- ___ xersei
- ___ pantalóns
- ___ zapatos
- ___ traxe de baño
- ___ bragas
- ___ suxeitador
- ___ sandalias
- ___ toalla de praia
- ___ libros
- ___ lentes de sol
- ___ aspirinas
- ___ cepillo
- ___ carné de identidade
- ___ cartos
- ___ tarxeta de crédito
- ___ cepillo de dentes
- ___ pasta de dentes
- ___ protector solar
- ___ xampú
- ___ secador de pelo



B. Cando ti saes unha fin de semana, levas as mesmas cousas que Sabela? Levas outras? Coméntao co teu compañeiro.

- Eu tamén levo sempre aspirinas, pero nunca levo secador de pelo.
- o Pois eu sempre levo espertador...

C. E nas seguintes situacións? Que cousas tes que levar? Relaciona.

1. Vou de viaxe ao estranxeiro.
2. Saio de compras.
3. Quero alugar un coche.
4. Vou á praia tomar o sol.
5. Quero bañarme na piscina.
6. Vou á clase de galego.
7. Vou a unha festa de aniversario.
8. Vou cear á casa duns amigos.

- A. Teño que levar diñeiro.
- B. Teño que levar o carné de conducir.
- C. Teño que levar un traxe de baño.
- D. Teño que levar un presente.
- E. Teño que levar o Aula de Galego.
- F. Teño que levar un protector solar.
- G. Teño que levar o pasaporte.
- H. Teño que levar unha botella de viño ou unha sobremesa.



3. ESTA OU ESA?

A. Nestes diálogos aparecen algúns demostrativos que se refiren a determinados substantivos. A cal das seguintes pezas se refiren en cada caso: un **xersei**, uns **zapatos**, unhas **sandalias** ou unha **camiseta**? Relaciona as preguntas e as respostas dos diálogos.

PREGUNTAS


- Cal é máis barato? Este ou ese?
- Esta verde é un pouco pequena, non?
- Estes marróns, non che parecen preciosos?
- Estas azuis ou aquelas verdes?

RESPOSTAS

- o Pois, a verdade é que prefiro aqueles negros.
- o Non o sei... esas laranxa tamén son moi bonitas...
- o Este vermello.
- o Esa si, pero podo buscarche outra talla.

Pregunta	Resposta	Refírense a...

B. Relaciona cada diálogo da sección **A** coa ilustración correspondente. Entendes por que se usan as diferentes formas dos demostrativos? Coméntao cun compañeiro.



C. Marca no seguinte cadro o xénero e o número dos substantivos.

	Masculino	Feminino	Singular	Plural
xersei				
sandalias				
zapatos				
camiseta				

D. Agora, marca nos diálogos de sección **A** todas as palabras que concordan en xénero e/ou en número cos substantivos **xersei**, **zapatos**, **sandalias** ou **camiseta**.

- Cal é máis barato? Este ou ese?
- o Este vermello.

4. NUNHA TENDA



A. Le e escoita este diálogo, e logo completa o cadro.

- Ola, bo día.
- o Bo día.
- Que desexa?
- o Quería un bolígrafo.
- De que cor?
- o Azul.
- Pois mire, aquí ten varios.
- o Canto custan?
- Este, 80 céntimos, e este outro, 2 euros.
- o Vale, pois levo este.

1. Que quere comprar? Como o di?	
2. Pregunta prezos? Como o di?	
3. Compra algo? Como o di?	

B. Agora completa estas preguntas.

- Canto estes zapatos?
- o Esta camiseta de aquí, canto

5. SITUACIÓNS

A. Todas estas frases son frecuentes en situacións de contacto social. En todas elas aparece un novo modo verbal: o imperativo. Poderías identificalo? Márcaos.

- Cóbreme, por favor!
- Deixa, xa pago eu.
- 15 euros? Teña.
- Pois mira, estamos tomando aquí unhas cervexas.
- Oia! Dous viños máis, por favor!
- Adeus! E chámame cando chegues, eh!
- E a min póñame un cortado.
- Toma algo, home.

B. O imperativo ten formas distintas para ti e para voste-de. Completa o cadro cos verbos que faltan.

ti	vostede
cóbrame	
.....	deixe
ten	
.....	mire
oe	
.....	chámeme
ponme	
.....	tome

Numerais

→ Resumo gramatical p. 130-131

100	cen	1000	mil/un milleiro
101	cento un/unha	2000	dous/dúas mil
102	cento dous/dúas	...	...
...	...	10 000	dez mil
200	douscentos/ duascentas	20 000	vinde mil
300	trescentos/as	100 000	cen mil
400	catrocentos/as	200 000	douscentos mil
500	cincocentos/as	...	duascentas mil
600	seiscentos/as	...	...
700	setecentos/as	1 000 000	un millón
800	oitocentos/as	2 000 000	dous millóns
900	novecentos/as	1 000 000 000	mil millóns

3549287 = tres millóns cincocentos/as corenta e nove mil douscentos/duascentas oitenta e sete

Alguns usos do imperativo

→ Resumo gramatical p. 140-141

Invitar

- **Toma** algo connosco! (Ti) / **Tome** algo. (Vostede)
- **Deixa**, xa pago eu. (Ti) / **Deixe**, xa pago eu. (Vostede)

Captar a tención de algúen

- **Escoita**, espera que te levo. (ti)
- **Escoite**, espere que o levo. (vostede)

Introducir unha explicación ou presentar alguén

- Pois, **mira**, ultimamente non estou saíndo con ninguén. (ti)
- **Mire**, preséntolle o señor Núñez. (vostede)

Entregar algo

- **Ten**. (ti) / **Teña**. (vostede)

Pagar

- **Cóbrame**, por favor! (ti) / **Cóbreme**, por favor. (vostede)

Concluir unha conversa ou animar a facer algo

- **Veña***, ata outro día.
- **Veña**, home, apúntate á festa! (ti)
- **Veña**, home, apúntese á festa! (vostede)

* **Veña** utilízase como unha expresión fixa tanto para **vostede**, coma para **ti**. Pero se nos referimos á acción do verbo **vir** utilízanse **ven** (ti) e **veña** (vostede).

Cores

branco/a		vermello/a		verde		cinza	
amarelo/a		rosa		lila		marrón	
laranxa		azul		negro/a		beixe	

- De que cor é o xerseí?
- Laranxa.

De compras

- **Teñen** auga/gorros/lentes...?
- Quería auga/un gorro/unhas lentes...
- **Canto** custa este gorro?/**Canto custan** estas lentes?
- **Levo este** gorro./**Levo este**.
- **Levo estas** lentes./**Levo estas**.

Demostrativos

→ Resume gramatical p. 133

	Masculino		Feminino		Neutro
	Singular	Plural	Singular	Plural	
aquí	este	estes	esta	estas	isto
aí	ese	eses	esa	esas	iso
alí	aquel	aqueles	aquela	aquelas	aquilo

- É teu **este** coche?
- Non, o meu é **aquel**.
- Quero mercar **aquela** saia azul.
- Pois eu, **aqueles** pantalóns marróns.

Os demostrativos contraen coas preposicións **de** e **en**.

	este(s)	ese(s)	aquel(es)	isto	iso	aquilo
	esta(s)	esa(s)	aquela(s)			
de	deste(s)	dese(s)	daquel(es)	disto	diso	daquilo
	desta(s)	desa(s)	daquela(s)			
en	neste(s)	nese(s)	naquel(es)	nisto	niso	naquilo
	nesta(s)	nesa(s)	naquela(s)			

- Traballo **naquel** edificio con cristais negros.
- Quen é o dono **deste** coche?
- Ti sabes algo **disto**?

Que + substantivo e cal/cales

→ Resumo gramatical p. 137

Que + substantivo serve para preguntar por obxectos ou cousas. Cando xa sabemos a que nos referimos, podemos usar **cal/cales** e non repetir o substantivo.

- **Que bikini** lle compro a Xulia?
- Non sei. **Cal** é o máis barato?

- **Que zapatos** lle compro a Luis?
- Non sei. **Cales** che gustan máis?

Expresar a necesidade: ter que + infinitivo

(eu)	teño	
(ti)	tes	
(el/ela/vostede)	ten	que + infinitivo
(nós)	temos	
(vós)	tendes/tedes	
(eles/elas/vostedes)	teñen	

- Hoxe teño unha cea. **Teño que mercar** algo para levar.

Fórmulas de cortesía

- **E a familia, que tal?**
- **Sáudos a Pedro!**
- **E a súa/túa muller, como está?**
- **Dálle un bico a túa irmá!**
- **Recordos á túa/súa familia!**
- **Déalle un saúdo a súa nai!**

Dar excusas e xustificarse

Cando rexeitamos unha invitación ou nos negamos a facer algo é unha norma de cortesía case obrigatoria explicalo ou xustificalo. Para iso, xeralmente empregamos **é que**.

- Vés á cea do sábado?
- Non podo. **É que** teño que estudar.

- **É que** serve tamén para xustificar unha petición.
- Podo pechar a ventá? **É que** entra moito frío.



6. BINGO

A. Este é o teu cartón para xogar ao bingo. Primeiro tes que escribir as cifras en letras.



CD 33

B. Agora imos xogar ao bingo. O teu cartón ten que ter once celas. Por iso, antes tes que riscar cinco. Fíxate ben no xénero: que di, **douscentos** ou **duascentas**?



7. QUE XERSEI PREFIRES?

Tes que elixir un obxecto de cada tipo: un xersei, unhas botas, un gorro, uns pantalóns e unhas lentes de sol. Cal prefires? Coméntao cun compañeiro

- Que xersei prefires?
- Este, o verde, e ti?
- Eu, o vermello.



8. A FEIRA NA CLASE

Imos dividir a clase en vendedores e clientes. Cada vendedor ten que atopar na clase tres obxectos do mesmo tipo e decidir que prezo teñen. Atención! O prezo mínimo dos produtos é de 15 euros e o máximo 35. Os clientes teñen que comprar tres obxectos, pero só teñen 50 euros cada un.

Cliente

Ola.
Bo(s) día(s)/boa(s) tarde(s).

Quería uns zapatos (para min/para home/para muller/para neno/para nena).

E estes canto custan?
Canto custan estes (de aquí)?

(Pois) levo estes/estes negros.
(Pois) levo os negros.

Moitas grazas.

Vendedor

Ola.
Bo(s) día(s)/boa(s) tarde(s).

Que desexa?
É/Son para vostede?
De que cor?

Si, temos estes.
Si, estes de aquí.

XXX euros.

Grazas a vostede.



9. UNHA FIN DE SEMANA EN PORTONOVO


A. Ides pasar unha fin de semana nunha casa de Portonovo. Cada un leva na maleta a súa roupa e os seus produtos de hixiene persoal. Pero, que máis queredes levar? En grupos de tres, pensade noutras cinco cousas que tendes que levar, cousas que compartiredes todos.



- Eu creo que temos que levar unha cámara de fotos.
- E unha guía das Rías Baixas!
- Si, é verdade...

B. Agora tendes que decidir como ides conseguir esas cousas. Alguén de vós ten algunha delas? Tendes que mercalas?

- Quen ten unha cámara de fotos?
 - Eu.
- Vale, entón levamos a cámara de Sabela.
 - E quen ten unha guía das Rías Baixas?
- Eu non.
 - Pois logo temos que mercar unha.



10. MÁIS DE 3 000 TENDAS DE ROUPA EN TODO O MUNDO

A. Hai algunhas marcas galegas que teñen presenza en todo o mundo. Algunhas das máis populares internacionalmente son as do grupo Inditex. Le este artigo e sinala todas as marcas que coñeces.

B. Volve ler o texto e completa o cadro.

INDITEX EN NÚMEROS

Ano de creación:
 Número de marcas:
 Número de países nos que está presente
 Número total de tendas: 3 594

C. Coñeces outras empresas galegas noutros países?



HISTORIA

1975. ZARA abre a súa primeira tenda de roupa na Coruña.

1976. ZARA abre tendas noutras cidades de España.

1985. Creación de Inditex, nome do grupo de empresas.

1988. Inditex abre a primeira tenda ZARA fóra de España, en decembro de 1988, no Porto (Portugal).

1989-1990. Estados Unidos e Francia son os seguintes mercados nos que Inditex comeza a súa actividade, coa apertura de tendas en Nova York (1989) e París (1990).

1991. Nace a cadea de tendas de moda PULL&BEAR. Inditex compra o 65% de MASSIMO DUTTI.

1992-1994. Inditex prosegue a apertura de novos mercados internacionais: México en 1992, Grecia en 1993, e Bélxica e Suecia en 1994.

1995-1996. Inditex compra o 100% de MASSIMO DUTTI e abre novas tendas en Malta e en Chipre.

1997. Inditex abre tendas en Noruega e en Israel.

1998. Nace BERSHKA, cadea dirixida ao público feminino máis mozo. Inditex abre novas tendas en Xapón, Turquía, Arxentina, Emiratos Árabes, Venezuela, Líbano, Kuwait e Reino Unido.

1999. Inditex compra a cadea STRADIVARIUS e abre tendas en Holanda, Alemaña, Polonia, Arabia Saudita, Bahrein, Canadá, Brasil, Chile e Uruguai.

2000. Apertura de tendas en Austria, Dinamarca, Qatar e Andorra. Inditex constrúe unha espectacular sede central en Arteixo (A Coruña).

2001. Inditex empeza a cotizar en bolsa. O grupo introdúcese en Porto Rico, Xordania, Irlanda, Islandia, Luxemburgo, República Checa e Italia. Nace OYSHO, unha cadea de tendas dedicada á lencería.

2002. Inditex abre novas tendas en Suíza, Finlandia, República Dominicana, O Salvador e Singapur.

2003. Inditex abre as primeiras tendas de ZARA HOME (a oitava do grupo). O grupo tamén se introduce en Eslovenia, Eslovaquia, Rusia e Malaisia.

2004. Apertura da tenda número 2000 en Hong Kong. Ademais, ábrese as primeiras tendas en Marrocos, Estonia, Letonia, Romanía, Hungría, Lituania e Panamá.

2005. Inditex abre as súas primeiras tendas en Mónaco, Indonesia, Tailandia, Filipinas e Costa Rica.

2006. Serbia, China e Tunisia únense á lista de mercados onde Inditex ten presenza.